

## De blaue Himmel unn goldene Zeide

De Schorsch unn isch, mir hadde omm letzde Moondaach vorm Owendesse mett e bissi Abstand omm Moo uffere Bonk gesotze, hadde unsern Mundschutz unners Kinn gezooche, hadde de blaue Himmel unn de zunehmende Mond oogeguggd unn hadde iwver su alles meeschliche gebabbeld, bis uff oomol de Schorsch seet: Wenn isch in dess Blaue vumm Himmel enoi gugg, muss isch onn die Mondfahrer denke.

Die amerikanische Mondfahrer, saach isch, Schorsch, dess iss awwer schunn long her. Ja, seeder, mir hadde sellemols – unn isch waaß noch genau wonn dess gewese iss, nemlich omm oonunzwonsichsde Juli 1969 in de Nacht vunn Sunndaach uff Moondaach – die gons Nacht vorm Fernseher gesotze unn hawwe uns dess Spektakel oogeguggd, bisses endlich korrz nooch vier Uhr su weit war, dass de Armstrong uffem Mond erumgehibbd iss unn e bissi später aach soin Kummbeer Aldrin.

Isch habb geniggd: Schorsch, mir warn e jung Familie unn hadde noch koon Fernseher, mir hawwe bei Mudder unn Vadder in de Hauptstrooß geguggd. Unser Mädcher dorrfde aach gugge, nor unsern Bub hott geschloofe.

Ja, seet de Schorsch, die Fraa unn isch unn unsern Äldste hawwe die gons Nacht geguggd. Mir hadde doomols schunn enn Fernseher gehabbd, enn Schwarz-Weiße, weils joo noch e paar Jahr gedauert hott, bis merr de ersde Farbfernseher kaafe konnt, unn die Bilder vumm Mond warn suwiesu schwarz-weiß. Dess war dess oone. Dess onnere unn jetz kumme isch uff dess Himmelsblau, war e Halbjahr frieher dess ersde Farbfoto vunn unsererne Erd, was vunn de Besatzung vunn Apollo 8 gemacht worrn iss. Isch habbs sellemols kaaft, habbs oigeroomd und su duts noch immer in unserm Hobbyraum hänge. Iwverischsens dut die Erd uff dem Bild genausu aussehe wie doo owwe de Mond, aach nor halb ze seh. Dess Foto host du doch aach, Honnes.

Ja, saach isch, dess habb isch aach.

Doo moont de Schorsch: Awwer ess hott long gedauerd bis merr klar worrn iss, was dess Foto uns zeiche dut. Unser Erd, Honnes, unsern blaue Planet gons alloo im Weltall unn iwverall um uns erum iss alles schwarz unn kalt, unn nor weil die Sunn die Erd bescheine unn wärme dut sitze mir zwaa hier uff de Bonk, gugge in die Luft unn babbele.

Isch saach: Schorsch, dess Foto misst jeder Politiker in soim Büro hänge hawwe, weiler jeden Daach droo erinnert wernn misst, dasses nor oo oonsich Erd gewwe dut. Unn dass merr endlich allzesomme oofonge misse, Wasser unn Lond unn Klima ze erhalle, weil joo aach noch unser Kinner unn Kinneskinner in dere Welt ze lewe hawwe.

Jetzt hawwe merr widder de Mond oogeguggd unn geseh, dasser in de letzd Verrdelstunn schunn e bissi noch Wessde weider gewonnerd iss.

De Schorsch frächt: Was moonsden du, wies mett unsererne scheene Erd weidergieht?

Isch habb enn Aacheblig noochgedenknd unn donn gesaad: Vier Sache mache merr Gedonke: Vill ze vill Mensche, ess Insektesterwe, ess Plastik im Meer unn die Hitz iwverall, unn weils immer mieh Mensche, immer wenischer Insekte, immer mieh Plastik im Meer gewwe dut unn weils immer wärmer werdd doo werdds schwer ferr unser Noochkumme, ess Lewe uff unsern blaue Planet su weiderzefiehrn wie die gons Zeit iwver.

Honnes, seet de Schorsch, irschendwonn werdd merr feststelle, dass unser Generation die goldene Zeit vunn de Menschheitsgeschichte erlebt hott, moonsde nitt aach?

Doo habb isch nor geniggd.

Honne516

Eiern Honnes.